

Personal Disciple-Making Plan

What is Disciple-Making?

Sa ating pagsunod sa Panginoong Jesus, binabago niya ang ating mga isipan, mga hangarin, mga relasyon at mga pangarap sa buhay. Binigyan tayo ng bagong buhay ng Panginoon para ibahagi din ito sa iba at sanayin sila sa pagsunod sa kanya: "Pinili ko kayo upang kayo'y magbunga" (Jn 15:16). Kung ano ang natutunan natin ay siya namang ibabahagi natin sa iba, tulad ng halimbawa ni apostol Pablo kay Timoteo (2 Tim 2:2). Ito ang tinatawag na "*disciple-making*."

Ibig sabihin, walang sinumang nagsasabing siya ay tagasunod ni Jesus ang makukuntentong nakaupo lang sa bangko at nagmamasid. Lahat ay may bahagi sa huling utos ni Jesus bago siya bumalik sa langit: "*Make disciples of all nations...*" (Mt 28:19). Saanman tayo naroroon, saanmang sulok ng mundo tayo dalhin ng Diyos, ang layunin natin ay "*to make disciples who make disciples who make disciples*" hanggang maabot lahat ng mga lahi sa mundo at bumalik na ang Panginoon.

Ano ba ang *disciple-making*? Ang *disciple-making* ay, una, dapat na *intentional*: "Habang kayo'y humahayo..." (Mt 28:19). Hindi natin ito magagawa kung nakaupo lang, hindi nagpaplano at hindi naglalaan ng oras para sa iba.

Ikalawa, dapat ito rin ay *relational*: "Bautismuhan ninyo sila sa pangalan ng Ama, at ng Anak, at ng Espiritu" (Mt. 28:19). Hindi lang basta mailubog sila sa tubig, kundi maakay sa isang malapit na relasyon sa tatlong persona ng Diyos at maikonekta sa pamilya ng Diyos - ang Iglesia o Church (*GraceCommunity*).

Ikatlo, dapat ito rin ay *practical* o *transformational*: "Turuan ninyo silang sumunod sa lahat ng iniutos ko sa inyo" (Mt 28:20). Hindi lang basta mag-aral ng Bibliya, kundi maturuan silang magtiwala at sumunod sa Diyos sa lahat ng bahagi ng kanilang buhay. Our goal is not just information, but transformation (Rom 12:1-2; 2 Cor 3:18).

Panghuli, para maturuan sila, dapat ito ay *personal*. Tulad ng halimbawa ng Panginoon sa kanyang pagtuturo sa mga tagasunod niya. Inilaan niya ang oras, lakas, at buhay niya para sa kanila. Nagbigay siya ng magandang halimbawang dapat nilang tularan. Tulad ni apostol Pablo sa mga taga-Tesalonica (1 Tes 2:7-12) na para siyang isang "mapagkalingang ina," inihandog "ang aming buhay" dahil "sa laki ng aming pagmamahal sa inyo"; at tulad din ng "ama" - "pinayuhan namin kayo, pinalakas namin ang inyong loob, at hinikayat na mamuhay nang tapat sa paningin ng Diyos."

Kung ang disciple-making ay hindi optional sa bawat isang tagasunod ni Jesus, dapat tayong magplano para makasunod dito. Magcocommit ako, bilang inyong pastor, kasama ng mga iba pang elders ninyo dito sa church, at ng mga lidars na nagsisimula na sa disciple-making - na tutulungan kayong lahat na makasulat ng isang "*personal disciple-making plan*." Naglalaman ito ng ilang mga tanong para mapag-isipan nating mabuti ang tugon natin sa paanyaya sa atin ng Panginoong Jesus na ipamuhay ang ating bagong buhay sa kanya - bilang mga learners, family members, worshippers, servants, missionaries at disciple-makers.

Habang ginagawa natin ito, makakaasa tayo sa ipinangakong presensiya ng Panginoon, "Tandaan ninyo, ako'y laging kasama ninyo hanggang sa katapusan ng panahon" (Mt 28:20).

Five-Fold Identity of a Disciple

Learner

Kung ako ay isang *learner*, paano ko matututunan ang mga katotohanang babago sa buhay ko? Ang buhay ng isang disciple ay buhay ng isang mag-aaral o estudyante (*learner*). Nakikinig tayo sa mga salita ng ating Guro, ang Panginoong Jesus. Habang tinuturuan niya tayo sa pamamagitan ng kanyang Salita, binabago niya tayo at ang buhay natin dito sa mundo. Pag-isipan mong mabuti kung paano mo paplanuhing magbasa, magkabisa (*memorize*), at mag-aral ng Salita ng Diyos. Pero huwag na huwag mong kalilimutang ginagawa natin ito hindi para maragdagan ang kaalaman natin, kundi para magkaroon ng pagbabago sa puso natin (*heart transformation*). Ang layunin natin ay hindi lang paniwalaan ang Salita ng Diyos, kundi sundin at ipamuhay ito.

Family Member

Kung ako ay isang *family member*, paano ko maipapakita ang pag-ibig ng Diyos sa mga kapatid ko kay Cristo bilang miyembro ng isang local church? Hindi tayo masasanay sumunod sa Panginoong Jesus nang nag-iisa. Kailangan natin ang isa't isa. Kailangan natin ang isang local church – isang pamilya ng magkakapatid kay Cristo na sama-samang ipinamumuhay ang kanyang mga salita. Natututo tayong magpasakop sa mga lider, mag-ibigan sa isa't isa, magpaalalahanan, at sama-samang tuparin ang layunin ng Diyos sa bawat isa. Kung tayo'y isang pamilya, planuhin mo kung paano mo maipapakita sa kapatid mo ang pag-ibig ng Diyos at makikipagtulungan sa paglilingkod sa iba't ibang ministeryo.

Worshiper

Kung ako ay isang *worshipper*, paano ko papainitin ang pag-ibig ko sa Diyos? Ang Diyos ang ating Ama, tayo ay kanyang mga Anak. Ang layunin ng pagliligtas sa atin ay upang sumamba sa kanya – ngayon at magpakailanman. Dapat iwasan nating ang mga ginagawa natin ay panlabas lang, mekanikal, parang ritwal lang. Pinupuno natin ang isip natin ng Salita ng Diyos, para ang puso natin ay masanay na umibig sa Diyos. Sa mga disiplinang espirituwal tulad ng pagsamba, pananalangin, pag-aayuno (*fasting*) at pagbibigay, ang layunin natin ay mas masabik ang damdamin natin na makipagtagpo at mapalapit pa sa Diyos.

Servant

Kung ako ay isang *servant*, paano ko maibabahagi sa ibang tao ang pag-ibig ng Diyos – sa salita at sa gawa? Tulad ni Jesus na inialay ang kanyang buhay para maibalik at mailapit tayo sa Diyos, tayo namang mga tagasunod niya ay ibibigay din ang buhay para sa iba. Hindi lang natin tinatanong, “Ano ang kalooban ng Diyos sa buhay ko?” Tinatanong din natin, “Paano ko matitiyak na ang buhay ko ay nakaayon sa kalooban niya para sa buong mundo na makarinig ng Mabuting Balita (*gospel*), magsisi at sumampalataya kay Jesus?” Bawat taong inilagay ng Diyos sa buhay mo ay isang makasalanang nangangailangan ng Tagapagligtas. Ganyan ka din dati. Pero may naglaan ng panahon para sa iyo kaya ngayon ay nakay Cristo ka na. At ito ngayon ang layunin kung bakit nilikha, iniligtas at pinagpapala ka ng Diyos – para sabihin sa iba at ipakita sa pamamagitan ng mabuting gawa ang pag-ibig ng Diyos sa mga kamag-anak mo, kaibigan, kaeskuwela, katrabaho, mga mahihirap, mga inaapi, at mga bata.

Missionary

Kung ako ay isang *missionary*, paano ako makakatulong na mabigyang-karangalan ang Diyos sa lahat ng lahi – sa Pilipinas man o sa ibang bansa? Kung paanong isinugo ng Ama ang kanyang Anak para tuparin ang kanyang misyon dito sa mundo, tayo rin ay isinusugo ni Jesus para abutin ang lahat ng lahi upang ang kanyang pangalan ay matanyag sa lahat ng sulok ng mundo. “Make disciples of *all nations*.” Saan ka man nakatira ngayon, paano magkakaroon ng impact ang buhay mo sa lahat ng bansa, tribo, wika at lahi sa mundong ito? Hindi lang ito para sa mga extraordinary missionaries, kundi para sa mga ordinaryong tagasunod ng Panginoong Jesus. Sa panahon ngayon, dahil sa migration, Internet, at globalization, abot-kamay na natin ang ibang mga lahi. Magagawa nating abutin ang natitira pang mga lahi (tulad ng mga Muslim) na di pa nakakakilala sa Panginoong Jesus – kung tulung-tulong tayo sa panalangin, pagbibigay, pagpunta, at pagsuporta sa mga pumupunta sa kanila.

The Disciple as a Disciple-Maker

Hindi ka lang isang disciple, ikaw din ay disciple-maker! Kung paano ka natulungan ng iba sa pagiging disciple, ganoon din dapat ang gawin mo sa iba. **Kung ako ay isang *disciple-maker*, paano ko masasanay ang ilan sa mga kapatid ko kay Cristo na makasunod din sa kanya?** Inilaan ni Jesus ang kanyang buong buhay para maturuan at makasama ang iilan (12 disciples/apostles). Ito ang malinaw na strategy ng Panginoon na nais niyang tularan natin – ang abutin ang buong mundo sa pamamagitan ng bawat isa sa atin na inilalaan ang buhay sa iilan. Saan man tayo dalhin ng Panginoon, ii-invest natin ang buhay natin sa ilang mga tagasunod ni Jesus para sila rin ay maturuan ng Salita ng Diyos, makasunod, maipamuhay at maituro din ito sa iba. Ito ang naging kagalakan ng Panginoong Jesus, ito rin ang sabik at masaya nating gagawin habang tayo ay nabubuhay at naghihintay sa kanyang pagbabalik.

Dahil nasasabik tayo sa pagbabalik niya at alam nating may bahagi (*participation*) tayo para magkaroon ng katuparan iyon, mahalaga ang personal na pagpaplanong gagawin natin bilang isang hakbang para maranasan natin nang lubusan ang nag-uumapaw na biyaya ng Diyos sa ating buhay. Wala nang buhay na mas masaya pa kaysa sa buhay na nakalaan at nakikibahagi sa misyon ng Diyos para sa buong mundo! Bakit mo pa nga naman sasayangin ang buhay mo sa pag-abot sa isang pangarap o ambisyong higit na mababaw kaysa dito?

A Disciple-Making Plan

1. **Learner:** *Paano ko matututunan ang mga katotohanang babago sa buhay ko?*

How will I read God's Word?

Maaari kang magsimula sa pagbabasa ng isang chapter sa isang araw, o pwede kang gumamit ng isang *Bible reading plan* para matapos basahin ang buong Bibliya sa loob ng isa o dalawang taon. Meron ding mga Bible apps na may mga Bible reading plans tulad ng *Olive Tree* at *YouVersion*.

How will I memorize God's Word?

Habang nagbabasa ka, humanap ka ng isa o ilang mga talata na pagtutuunan ng pansin at pag-iisapang mabuti kung ano ang sinasabi ng Diyos sa iyo para maipamuhay. Pagkatapos, sikaping kabisaduhin ito. Pwede kang magsimula sa isang verse lang sa isang linggo, at dagdagan mo pa kung nasasanay ka nang magkabis.

How will I learn God's Word from others?

Ang pag-aaral ng Salita ng Diyos ay hindi lang self-study. Kailangan natin ng mga pastor, guro at ang bawat isa na tapat na ituturo ang Salita ng Diyos sa atin at tutulungan tayong sumunod dito. Mag-isip ka ng mga simple at tiyak na paraan para mas matutunan mo ang Salita ng Diyos sa iba, maging ito ay sa worship gathering, sa isang small group (tulad ng *GraceCommunity* at *Fight Club*), sa *Doulos School of Ministry*, o sa ilang mga aklat at iba pang resources.

2. Family Member: *Paano ko maipapakita ang pag-ibig ng Diyos sa mga kapatid ko kay Cristo bilang miyembro ng isang local church?*

Where?

Saang iglesia o church ka magpapa-miyembro at aktibong makikibahagi? Saang bahagi ng church o partikular na grupo o ministryo ang sasalihan mo?

What?

Habang pinagmamasdan mo ang mga nangyayari sa church o grupong kinabibilangan mo, pag-isipan mo kung anu-anong bagay ang magagawa mo para matulungan ang church o grupong iyon. Isipin mo ang mga tiyak at kongkretong bagay na gagawin mo para maipakita ang pag-ibig ng Diyos sa ikalalago at ikatitibay ng kanyang Katawan, ang Iglesia.

3. Worshiper: *Paano ko papainitin ang pag-ibig ko sa Diyos?*

How will I worship?

Anu-anong paraan ang gagawin mo para makatiyak na naka-focus ka sa pagsamba sa lahat ng bahagi ng buhay mo? Paano mo gagawing prayoridad ang lingguhang pagsamba kasama ang church family mo? Paano ka sasamba, bukod sa araw ng Linggo, kasama ang iba (*GraceCommunity*, Prayer Meeting, family worship, atbp.)?

How will I pray?

Anong oras ang ilalaan mo naman sa pansarili mong pagsamba (*Quiet Time*) para makipagtagpo sa Diyos na iyong Ama? Saan mo ito gagawin? Maghanap ng lugar at oras na makakapagconcentrate ka at walang iistorbo. Subukang gamitin ang Bible reading at prayer guide na ibibigay ng church.



How will I fast?

Minsan sa isang linggo o minsan sa loob ng ilang linggo, sa halip na kumain ng almusal, tanghalian o hapunan, ilaan ang oras na iyon sa panalangin at pagbabasa ng Salita ng Diyos. Kapag nasanay ka na sa fasting, magplano naman ng pagpapaliban ng dalawang meals sa maghapon o hindi pagkain sa loob ng 24 oras. May ilang beses sa isang taon, magkakaroon ng sama-samang *Day of Prayer and Fasting* ang church. Sikaping makilahok dito.



How will I give?

Isa sa pinakamabisang paraan para mas uminit ang pag-ibig natin sa Diyos ay sa pamamagitan ng pagbibigay ng mga resources na ibinigay sa atin ng Diyos bilang pagsunod sa kanya. Nagsisimula ito sa pagbibigay sa church, iminumungkahing magsimula sa 10% ng kinikita at tinatanggap. Habang mas lumalaki ang pagpapala ng Diyos, planuhin ding dagdagan at matutong magbigay nang sagana, may pagsasakripisyo, at masaya. Habang umiinit ang pag-ibig natin sa Diyos, lumalamig naman ang hangarin natin sa mga bagay sa mundong ito.



4. **Servant:** *Paano ko maibabahagi sa ibang tao ang pag-ibig ng Diyos – sa salita at sa gawa?*

Who?

Isulat ang pangalan ng tatlo, o lima, o sampung mga taong di pa sumasampalataya at sumusunod kay Jesus (*unbelievers*) – mga taong iniligay ng Diyos sa buhay mo. Mag-commit na regular silang ipanalangin na dalhin sila ng Diyos, sa kapangyarihan ng Espiritu, palapit sa kanya at gamitin ka niya para ibahagi sa kanila ang Magandang Balita (*gospel*).

How?

Sa konteksto ng lugar kung saan ka nakatira, nagtatrabaho, nag-aaral o naglalaro/naglilibang, pag-isipan mo kung paano mo makukuwento sa kanila kung sino ang Diyos, kung ano ang laki ng problema ng tao (kasalanan), kung ano ang ginawang solusyon ni Jesus, at ang pangangailangan nating tumugon sa paanyaya ng Diyos. Tukuyin kung ano ang plano mong pinakaepektibong paraan ng pagbabahagi sa kanila. Pwedeng gamitin ang *The 12-Minute Story of God*, *The 12-Week Story of God*, *The Hope* (80-minute video), *Following Jesus* (6-weeks), *‘Wag Sayangin ang Buhay* (gospel tract), *Are You a Good Person?* (6-minute video).

When?

Sa mga taong isinulat mo, kailan mo sisimulang ibahagi ang Mabuting Balita sa kanila? Gagawin mo ba ito sa pamamagitan ng pag-anyaya sa kanila na kumain sa bahay n’yo? O iimbitahan sa worship gathering? O magseset ng schedule ng lingguhang pag-aaral ng Salita ng Diyos?

5. Missionary: *Paano ako makakatulong na mabigyang-karangalan ang Diyos sa lahat ng lahi – sa Pilipinas man o sa ibang bansa?*

How will I pray for the nations?

Masidhing ipanalanging dumating na ang kaharian ng Diyos at masunod ang kalooban ng Diyos sa buong mundo. Magplano kung paano ipapanalangin ang ibang bansa at ibang lahi, lalo na ang mga tinatawag na *unreached peoples*. Maaari mong gamitin ang *Operation World* (www.operationworld.org), *Unreached of the Day* (www.unreachedoftheday.org/ | may mobile app din ito); at *Global Prayer Digest* (www.globalprayerdigest.org).

How will I give to the nations?

Magplanong magsakripisyo at gumastos para sa ibang mga lahi. Isakripisyo ang mga gusto mong bilhin para sa matinding pangangailangan ng ibang lahi – lalo na ang pangangailangang makarinig ng Mabuting Balita. Maaaring dagdagan ang ibinibigay sa church (malaking porsyento ng budget natin ay napupunta sa missions) o humanap ng susuportahang mga organisasyon o mga taong ang focus ng ministry ay sa pag-abot sa mga *unreached*.

How will I go to the nations?

Pag-isipan at ipanalanging mabuti ang iba't ibang paraan para gugulin mo ang ilang panahon ng buhay mo, o dalhin ang pamilya mo, o samantalahin ang oportunidad sa trabaho mo para madala ang Mabuting Balita sa ibang lahi. Maaaring sumama ka sa isang *short-term mission trip*. O baka sinasabi ng Diyos sa iyo na maglaan ng mas mahabang panahon pa, o ilaan na ang buong buhay mo sa pagmimisyon sa ibang lahi. Gumawa ng plano tungkol dito, ayon sa gabay ng Panginoon.

6. Disciple-Maker: *Paano ko masasanay ang ilan sa mga kapatid ko kay Cristo na makasunod din sa kanya?*

Whom will I invite to disciple-making?

Isulat ang pangalan ng isa, dalawa, o tatlong kapatid kay Cristo na inilagay ng Diyos sa puso mo para gabayan sa pagsunod sa Panginoon at sanayin din sa *disciple-making*?

How will I bring them in?

Paano ko sila aanyayahan na maglaan ng ilang oras kada linggo sa one-on-one meeting para pagtulungan namin ang paglago sa pagsunod kay Cristo? Anu-anong adjustments ang gagawin ko sa aking schedule para makapaglaan ng oras sa kanila?

How will I teach them to obey?

Pag-isipan kung paano sila matuturuang sumunod sa lahat ng ipinag-uutos ng Panginoon. Tingnan ang pagbabago sa kanilang buhay. Maaari kang magsimula sa pamamagitan din ng paggamit ng mga tanong sa disciple-making plan na ito para matulungan silang magkaroon din ng personal na plano. Maaari ring gamitin ang *Following Jesus* (6 lessons), *First Steps* (7 lessons), at *Following Jesus the Lord of All* (12 months).

How will I model obedience?

Ang pagtuturo ay hindi lang sa pamamagitan ng pagbabahagi ng mga lessons sa kanila, kundi kailangan din nilang makita kung paano mo ipinamumuhay ang pagiging tagasunod ni Jesus. Sa paggawa ng mga *disciple-makers*, kasama dito ang pagsasabi sa kanila ng “Follow me.” Pag-isipan ang ilang paraan kung paano mo sila mapaglilingkuran at mabibigyan ng magandang halimbawa sa pagsunod kay Jesus. Isama dito ang mga paraan kung paano mo babantayan at aalagaan ang puso mo sa kabanalan (lalo na sa bahagi ng *relational at sexual purity*). Planuhin mo ding isama sila sa iba’t ibang paglilingkod tulad ng pagbabahagi ng *The Story of God* sa iba.

How will I send them out?

Ang layunin natin ay hindi lang para sila ay matulungang sumunod kay Jesus, kundi para balang araw sila rin ay matutong turuan at sanayin ang iba na sumunod kay Jesus at maging *disciple-makers* din. Pag-isipan kung paano mo sila ikukumisyon (*commission*) para makapagsimula na rin silang magsanay ng iba. Isipin mo din kung paano mo sila patuloy na paglilingkuran at gagabayan habang sila naman ang nagsasanay ng iba.

***This disciple-making plan is an adaptation of David Platt’s “Personal Disciple-Making Plan.” You can access the original pdf and other resources here: <http://wp.me/p2G3S5-nm>.

Ang planong ito ay natapos ni _____ sa tulong at paggabay ni _____ ngayong _____ (petsa).

Note: Pagkaraan ng isang taon, mainam na balikan ang planong ito, magkaroon ng evaluation kasama ang nag-disciple sa iyo, at gumawa ng panibagong plano.